

RS neće platiti odštetu za porušene džamije

2 februar 2012 Izmijenjeno 20:37 CET

Vrhovni sud odlučio da RS ne treba platiti odštetu od 128 miliona KM zbog 16 srušenih džamija 1993. godine u Banjoj Luci




Godine 1993. godine srušeno je svih 16 džamija u Banjoj Luci

Vrhovni sud Republike Srpske (RS) potvrdio je presudu Okružnog suda u Banjoj Luci prema kojoj RS ne treba platiti odštetu od 128 miliona konvertabilnih maraka Islamskoj zajednici (IZ) u Bosni i Hercegovini zbog 16 srušenih džamija tokom 1993. godine u Banjoj Luci. Prema ovoj presudi, IZ u BiH je dužna na ime sudskih troškova u republički budžet uplatiti 48.375 KM, rečeno je Srni u Pravobranilaštvu RS-a. "Na osnovu ove presude Vrhovnog suda RS-a, kao krajnje instance, obaveza isplate odštete RS-a i grada Banja Luka više ne postoji", ističu u Pravobranilaštvu RS-a.

Prema ovoj presudi, IZ u BiH je dužna na ime sudskih troškova u republički budžet uplatiti 48.375 KM.

"Radilo se o sporu ukupne vrijednosti 128 miliona KM, od kojih je 64,7 miliona KM bila glavnica i kamata koja je dostigla iznos glavnice. Nakon ove prvostepene presude, mi smo uložili žalbu i Okružni sud u Banjoj Luci poništio je ovu presudu i presudio u našu korist, a Vrhovni sud RS-a potvrdio je ovu presudu", kazao glavni pravobranilac RS-a je Slobodan Radulj za banjalučke Nezavisne novine.

Prvostepenom presudom Osnovnog suda u Banjoj Luci u februaru 2009. godine IZ u BiH je dobila spor protiv Pravobranilaštva RS-a u slučaju koji se odnosio na rušenje 16 banjalučkih džamija.



Ferhadija prije rušenja

Prva presuda u korist IZ u BiH

Tokom prvostepenog sudskog postupka IZ u BiH je tvrdila da su RS i Banja Luka odgovorne za rušenje džamija, jer su porušene za vrijeme trajanja policijskog sata. Sunita Šukalo, sudija Osnovnog suda u Banjoj Luci, nakon suđenja pred ovim sudom, presudila je u korist IZ u BiH. Pravobranilaštvo RS-a uložilo je žalbu i Okružni sud u Banjoj Luci poništio je ovu presudu i presudio u korist Pravobranilaštva RS-a, a Vrhovni sud RS-a je potvrdio presudu. Dragan Spasojević, zamjenik pravobranioca RS-a, smatrao je nakon prvostepene presude da je tužba IZ u BiH zastarjela, jer je podnesena sedam godina nakon rušenja džamija. Tokom prvostepenog postupka Pravobranilaštvo RS je, između ostalog, istaklo i kako je vještak IZ u BiH, na čijoj procjeni je sudija Sunita Šukalo bazirala ukupan iznos presude, bio u sukobu interesa. "Mi smo stava da je šteta trebalo biti i veća, jer je džamija Ferhadija vrijedila mnogo više od 30 miliona KM, koliko je iznosila procjena ovog vještaka", žalili su se zastupnici IZ u BiH nakon dobijene presude.

Izvor: Al Jazeera